

四庫全書

集部

欽定四庫全書

東坡全集卷六十三

宋 蘇軾 撰

奏議一十三首

乞擢用林豫劄子

元祐七年十月日龍圖閣學士左朝奉郎守兵部尚書  
蘇軾劄子奏臣竊謂才難之病古今所同朝廷每欲治  
財賦除盜賊幹邊鄙興利除害常有臨事乏人之歎古  
人有言寬則寵名譽之人急則用介冑之士所用非所

養所養非所用此古今之通患也臣伏見承議郎監東排岸司林豫自為布衣已有奇節及其從事所至有聲其在漣水屏除羣盜尤著方略其人勇於立事當有為國捐軀之意試之盤錯之地必顯利器伏望聖慈特與量材擢用若後不如所舉臣等甘伏朝典取進止

乞賻贈劉季孫狀

元祐七年十月日龍圖閣學士左朝奉郎守兵部尚書蘇軾狀奏臣等竊聞仁宗朝趙元昊寇延州危急環慶

將官劉平以孤軍來援衆寡不敵姦臣不救平遂戰歿  
竟罵賊不食而死詔贈侍中賜大第官其諸子慶孫貽  
孫宜孫昌孫孝孫保孫李孫等七人諸子頗有異材而  
皆不壽卒無顯者家事狼狽賜第易主獨李孫仕至文  
思副使年至六十篤志好學博通史傳工詩能文輕利  
重義練達軍政至於忠義勇烈識者以為有平之風性  
好異書古文石刻仕宦四十餘年所得祿賜盡於藏書  
之費近蒙朝廷擢知隰州今年五月卒於官所家無飢

石妻子寒餓行路傷嗟今者寄食晉州旅櫬無歸臣等  
實與季孫相知既哀其才氣如此死未半年而妻子流  
落又哀其父平以忠義死事聲迹相接四十年間而子  
孫淪替不蒙收錄豈朝廷之意哉今執政侍從多知季  
孫者如加訪問必得其實欲望朝廷特詔有司優與賻  
贈以振其妻子朝夕饑寒之憂亦使人知忠義死事之  
子孫雖跨歷歲月朝廷猶賜存恤於獎勸之道不為小  
補季孫之子三班借職璨見在京師乞早賜指揮謹錄

奏聞伏候勅旨

貼黃李孫身亡合得送還人為般擎女婿兩房並已  
死盡其喪柩見在晉州無由般歸京師欲乞指揮晉  
州候本家欲扶護歸葬日即與差得力廂軍三十人  
節級一人般至京師

再論李直方捕賊功效乞別與推恩劄子

元祐七年十一月初四日龍圖閣學士左朝奉郎守兵  
部尚書蘇軾劄子奏臣先知潁州日為有劇賊尹遇陳

興鄭饒李松等皆宿姦大惡為一方之患而汝陰縣尉李直方本以進士及第母年九十餘只有直方一子相須為命而能奮不顧身躬親持刃刺倒尹遇又能多出家財緝知餘黨所在分遣弓手前後捕獲功效顯著直方先公後私致所差人先獲陳興等三人而直方躬親後獲尹遇一名與賞格小有不應臣尋具事由聞奏乞以臣合轉朝散郎一官特與直方比附第三等循資酌獎後來朝旨只與直方免試竊緣選人免試恩例至輕

其間以毫髮微勞得者甚多恐非所以激勸捐軀除患之士伏望聖慈特賜檢會前奏別與推恩仍乞許臣更不磨勘轉朝散郎一官所貴餘人難為援例取進止

乞免五穀力勝稅錢劄子

元祐七年十一月初七日龍圖閣學士左朝奉郎守兵部尚書兼侍讀蘇軾劄子奏臣聞穀太賤則傷農太貴則傷末是以法不稅五穀使豐熟之鄉商賈爭糴以起太賤之價災傷之地舟車輻輳以壓太貴之直自先王



以來未之有改也而近歲法令始有五穀力勝稅錢使  
商賈不行農末皆病廢百王不刊之令典而行自古所  
無之弊法使百世之下書之青史曰收五穀力勝錢自  
皇宋某年始也臣竊為聖世病之臣頃在黃州親見累  
歲穀熟農夫連車載米入市不了鹽酪之費而蓄積之  
家日夜禱祠願逢饑荒又在浙西累歲親見水災中民  
之家有錢無穀被服珠金餓死于市此皆官收五穀力  
勝稅錢致商賈不行之咎也臣聞以物與人物盡而止

以法活人法行無窮今陛下每遇災傷捐金帛散倉廩  
自元祐以來蓋所費數千萬貫石而餓殍流亡不為少  
衰只如去年浙西水災陛下使江西湖北雇船運米以  
救蘇湖之民蓋百餘萬石又計糴本水脚官費不貲而  
客船被差雇者皆失業破產無所告訴與其官司費耗  
為害如此何似削去近日所立五穀力勝稅錢一條只  
行天聖附令免稅指揮則豐凶相濟農末皆利縱有水  
旱無大饑荒雖目下稍失課利而災傷之地不必盡煩

陛下出捐錢穀如近歲之多也今元祐編敕雖云災傷地分雖有例亦免而穀所從來必自豐熟地分所過不免收稅則商賈亦自不行議者或欲立法如一路災傷則隣路免稅一州災傷則隣州亦然雖比今之法小為通疎而隔一路一州之外豐凶不能相救未為良法須是盡削近歲弊法專用天聖附令指揮乃為通濟謹具逐條如後

天聖附令

諸商販斛斛及柴炭草木博糴糧食者並免力勝

稅錢

諸賣舊屋材柴草米麵之物及木鐵為農具者並  
免收稅其買諸色布帛不及疋而將出城及陂  
池取魚而非販易者並准此

元豐令

諸商販穀及以柴草木博糴糧食者並免力勝稅

錢

舊收稅處  
依舊例

諸買舊材植或柴草穀麵及木鐵為農具者並免  
稅布帛不及端足并捕魚非貨易者准此

元祐勅

諸興販斛斛及以柴炭草木博糴糧食者並免納

力勝稅錢

舊收稅處依舊例即災  
傷地分雖有舊例亦免

諸賣舊材植或柴草斛斛并麵及木鐵為農具者  
並免收稅布帛不及端足并捕魚非貨易者准  
此

右臣竊謂若行臣言稅錢亦必不至大段失陷何也五穀無稅商賈必大通流不載見錢必有回貨見錢回貨自皆有稅所得未必減於力勝而災傷之地有無相通易為振救官司省費其利不可勝計今肆赦甚近若得於赦書帶下益見聖德收結民心實無窮之利取進止

奏內中車子爭道亂行劄子

元祐七年南郊輅為鹵簿使導駕內中朱

紅車子十餘兩有張紅蓋者爭道亂行於輅明寺前輅於車中草比奏卷八上在太廟祀遣人以疏白太皇太后明日中使傳命中敕有司嚴整仗衛自皇后以下皆不復迎謁中道

元祐七年十一月十三日南郊鹵簿使龍圖閣學士左  
朝奉郎守兵部尚書兼侍讀蘇軾劄子奏臣謹按漢成  
帝郊祠甘泉泰畤陰后土而趙昭儀常從在屬車間  
時揚雄待詔承明奏賦以諷其略曰想西王母欣然而  
上壽兮屏玉女而却處妃言婦女不當與齋祠之間也  
臣今備位夏官職在鹵簿准故事郊祀既成乘輿還齋  
宮改服通天冠絳紗袍教坊鈞容作樂還內然後后妃  
之屬中道迎謁已非典禮而況方當祀事未畢而中宮

掖庭得在勾陳豹尾之間乎竊見二聖崇奉大祀嚴恭  
寅畏度越古今四方來觀莫不悅服今車駕方宿齋太  
廟而內中車子不避仗衛爭道亂行臣愚竊恐於觀望  
有損不敢不奏乞賜約束仍乞取問隨行合干勾當人  
施行取進止

再薦宗室令時劄子

元祐七年十二月二十二日龍圖閣學士左朝奉郎守  
兵部尚書兼侍讀蘇軾劄子奏臣前任潁州日曾論薦



本州僉判承議郎趙令時儒學吏術皆有過人恭儉篤行若出寒素意望朝廷特賜進擢以風曉宗室成先帝教育之志至今未蒙施行令時今已得替在京若依前與外任差遣臣竊惜之欲乞檢會前奏詳酌施行取進止

論高麗買書利害劄子三首

元祐八年二月初一日端明殿學士兼翰林侍讀學士左朝奉郎禮部尚書蘇軾劄子奏臣近准都省批送下

國子監狀准館伴高麗人使所牒稱人使要買國子監  
文字請詳批印造供赴當所交割本監檢准元祐令諸  
蕃國進奉人買書具名件申尚書省今來未敢支賣蒙  
都省送禮部看詳臣尋指揮本部令申都省除可令收  
買名件外其策府元龜歷代史太學敕式本部未敢便  
令收買伏乞朝廷詳酌指揮尋准都省批狀云勘會前  
次高麗人使到闕已曾許買策府元龜并北史今本部  
並不檢會體例所有人使乞買書籍正月二十七日送

禮部指揮許收買其當行人吏上簿者臣伏見高麗人使每一次入貢朝廷及淮浙兩路賜予餽送燕勞之費約十餘萬貫而修飾亭館騷動行市調發人船之費不在焉除官吏得少餽遺外並無絲毫之利而有五害不可不陳也所得貢獻皆是玩好無用之物而所費皆是帑廩之實民之膏血此一害也所至差借人馬什物攬撓行市修飾亭館民力暗有陪填此二害也高麗所得賜予若不分遺契丹則契丹安肯聽其來貢顯是借寇

兵而資盜糧此三害也高麗名為慕義來朝其實為利  
度其本心終必為契丹用何也彼足以制其死命而我  
不能故也今使者所至圖畫山川形勝窺測虛實豈復  
有善意哉此四害也慶厯中契丹欲渝盟先以增置塘  
泊為中國之曲今乃招來其與國使頻歲入貢其曲甚  
於塘泊幸今契丹恭順不敢生事萬一異日有桀黠之  
人以此藉口不知朝廷何以答之此五害也臣心知此  
五害所以熙寧中通判杭州日因其餽送書中不稱本

朝正朔却退其物待其改書稱用年號然後受之仍催促進發不令住滯及近歲出知杭州却其所進金塔不為奏聞及畫一處置沿途接待事件不令過當仍奏乞編配狡商猾僧并乞依祖宗編敕杭明州並不許發舶往高麗違者徒二年沒入財貨充賞并乞刪除元豐八年九月內創立許舶客專擅附帶外夷入貢及商販一條已上事並蒙朝廷一一施行皆是臣素意欲稍稍裁節其事庶幾漸次不來為朝廷消久遠之害今既備員

禮曹乃是職事近者因見館伴中書舍人陳軒等申乞  
盡數差勒相國寺行鋪入館鋪設以待人使買賣不惟  
移市動衆奉小國之陪臣有損國體兼亦抑勒在京行  
鋪以資吏人廣行乞取弊害不小所以具申都省乞不  
施行其乖一作多方作弊官吏並不蒙都省略行取問今

來只因陳軒等不待申請直牒國子監收買諸般文字  
內有策府元龜歷代史及敕式國子監知其不便申稟  
都省送下禮部看詳臣謹按漢書東平王宇來朝上疏

求諸子及太史公書當時大臣以謂諸侯朝聘考文章  
正法度非理不言今東平王幸得來朝不思制節謹度  
以防違失而求諸書非朝聘之義也諸子書或反經術  
非聖人或明鬼神信物怪太史公書有戰國縱橫權譎  
之謀漢興之初謀臣竒策天官災異地形阨塞皆不宜  
在諸侯王家不可予詔從之臣竊以謂東平王骨肉至  
親特以備位藩臣猶不得賜而況海外之裔夷契丹之  
心腹者乎臣聞河北榷場禁出文書其法甚嚴徒以契

丹故也今高麗與契丹何異若高麗可與即榷場之法  
亦可廢兼竊聞昔年高麗使乞賜太平御覽先帝詔令  
館伴以東平王故事為詞却之近日復乞詔又以先帝  
遺旨不與今歷代史策府元龜及北史竊以謂前次本  
不當與若便以為例即上乖先帝遺旨下與今來不賜  
御覽聖旨異同深為不便故申都省止是乞賜詳酌指  
揮未為過當便蒙行遣吏人上簿書罪臣竊謂無罪可  
書雖上簿薄責至為末事於臣又無絲毫之損臣非為



此奏論所惜者無厭小國事必曲從官吏苟循其意雖動衆害物不以為罪稍有裁節之意便行詰責今後無人敢逆其請使意得志滿其來愈數其患愈深所以須至極論仍具令來合處置數事如後

一臣任杭州日奏乞明州杭州今後並不得發舶往高麗蒙已立條行下今來高麗使却搭附閩商徐積船舶入貢及行根究即稱是條前發舶臣竊謂立條已經數年海外無不聞知而徐積猶執前條

公憑影庇私商往來海外雖有條貫實與無同欲  
乞特降指揮出榜福建兩浙沿海州縣與限半年  
內令繳納條前所發公憑如限滿不納敢有執用  
並許人告捕依法施行

貼黃據陳軒所奏語錄即是高麗知此條

今來高麗使所欲買歷代史策府元龜及敕式乞並  
不許收買

貼黃准都省批狀指揮人使所買書籍內有敕式若

令外夷收買事體不便看詳都省本為策府元龜及  
北史前次已有體例故以禮部並不檢會為罪未委  
敕式有何體例一槩令買

一近日館伴所申乞為高麗使買金薄一百貫欲於  
杭州妝佛臣未敢許已申稟都省竊慮都省復以  
為罪竊緣金薄本是禁物人使欲以妝佛為名久  
住杭州搔擾公私竊聞近歲西蕃阿里庫乞買金  
薄朝廷重難其事節次量與應副今來高麗使朝

辭日數已迫乞指揮館伴令以打造不出為詞更  
不令收買

一近據館伴所申乞與高麗使抄寫曲譜臣謂鄭衛  
之聲流行海外非所以觀德若畫朝旨特為抄寫  
尤為不便其狀臣已收住不行

貼黃臣前任杭州不受高麗所進金塔雖曾密奏聞  
元只作臣私意拒絕兼自來館伴使臣若有所求請  
不可應副即須一面說諭不行或其事體大即候拒

訖密奏今陳軒等事事曲從便為申請若不施行即顯是朝廷不許令使臣悅已而怨朝廷甚非館伴之體

右所申都省狀其歷代史策府元龜及敕式乞詳酌指揮事並出臣意不干僚屬及吏人之事若朝廷以為有罪則臣乞獨當責罰所有吏人乞不上簿取進止

貼黃臣謹按春秋晉盟主也鄭小國也而晉之執政韓起欲買玉環於鄭商人子產終不與曰大國之求

若無禮以節之是鄙我也又晉平公使其臣范昭觀政於齊昭請齊景公之觴為壽晏子不與又欲奏成周之樂太師不許昭歸謂晉侯曰齊未可伐也臣欲亂其禮而晏子知之欲亂其樂而太師知之今高麗使契丹之黨而我之陪臣也乃敢干朝廷求買違禁物傳寫鄭衛曲子譜褻慢甚矣安知非契丹欲設此事以嘗探朝廷深淺難易乎而陳軒等事事為請惟恐失其意臣竊惑之又據軒等語錄云高麗使言海

商擅往契丹本國王捉送上國乞更賜約束恐不穩  
便而軒乃答云風訊不順飄過乃是與閩中狡商巧  
說詞理許令過界竊緣私往北界條禁至重海外陪  
臣猶知遵稟而軒乃為歸咎於風以薄其罪豈不乖  
戾倒置之甚乎臣忝備侍從事關利害不敢不奏

又

元祐八年二月十五日端明殿學士兼翰林侍讀學士  
左朝奉郎守禮部尚書蘇軾劄子奏臣近奏論高麗使

所買書籍及金薄等事准尚書省劄子二月十二日三省樞密院同奉聖旨所買書籍曾經收買者許依例收買金薄特許收買餘依奏吏人免上簿者臣所以區區論奏者本為高麗契丹之與國不可假以書籍非止為吏人上簿也今來吏人獨免上簿而書簿仍許收買臣竊惑之檢會元祐編敕諸以熟鐵及文字禁物與外國使人交易罪輕者徒二年看詳此條但係文字不問有無妨害便徒二年則法意亦可見矣以謂文字流入諸



國有害無利故立此重法以防意外之患前來許買策  
府元龜及北史已是失錯古人有言一之謂甚其可再  
乎今乃廢見行編敕之法而用一時失錯之例後日復  
來例愈成熟雖買千百部有司不敢復執則中國書籍  
山積於高麗而雲布於契丹矣臣不知此事於中國得  
為穩便乎昔齊景公田招虞人以旌不至曰招虞人以  
皮冠孔子韙之曰守道不如守官夫旌與皮冠於事未  
有害也然且守之今買書利害如此編敕條貫如彼比

之皮冠與旌亦有間矣臣當謹守前議不避再三論奏  
伏望聖慈早賜指揮取進止

貼黃臣點檢得館伴使公案內有行下承受所收買  
文字數內有一項所買策府元龜款式雖不曾賣與  
然高麗之意亦可見矣

又貼黃臣已令本部備錄編敕條貫符下高麗人使  
所過州郡約束施行去訖亦合奏知

又

元祐八年二月二十六日端明殿學士兼翰林侍讀學士左朝奉郎守禮部尚書蘇軾劄子奏臣近再具劄子奏論高麗買書事今准敕節文檢會國朝會要淳化四年大中祥符九年天禧五年曾賜高麗九經書史記兩漢書三國志晉書諸子歷日聖惠方陰陽地理書等奉聖旨依前降指揮臣前所論奏高麗入貢為朝廷五害事理灼然非復細故近又檢坐見行編敕再具論奏並不蒙朝廷詳酌利害及編敕法意施行但檢坐國朝會

要已曾賜予便為收買竊緣臣所論奏所計利害不輕  
本非為有例無例而發也事誠無害雖無例亦可若其  
有害雖百例不可用也而況會要之為書朝廷以備檢  
閱非如編敕一一皆當施行也臣只乞朝廷詳論此事  
當遵行編敕耶為當檢行會要而已臣所憂者文書積  
於高麗而流於契丹使北人周知山川嶮要邊防利害  
為患至大雖曾賜予乃是前日之失自今止之猶賢於  
接續許買蕩然無禁也又高麗人入朝動獲所欲頻歲

數來馴致五害如此之類皆不蒙朝廷省察深慮高麗人復來遂成定例所以須至再三論奏兼今來高麗人已發無可施行取進止

貼黃今來朝旨止為高麗已曾賜予此書復許接續收買譬編敕禁以熟鐵與人使交易豈是外國都未有熟鐵耶謂其已有反不復禁此大不可也

繳進免五穀力勝稅錢議劄子

前連元祐七年十一月劄子

元祐八年三月十三日端明殿學士兼翰林侍讀學士

左朝奉郎守禮部尚書蘇軾劄子奏臣聞應天以實不以文動民以行不以言去歲扈從南郊親見百姓父老瞻望聖顏歡呼鼓舞或至感泣皆云不意今日復見仁宗皇帝臣尋與范祖禹具奏其狀矣竊揆聖心必有下酌民言上繼祖武之意兼奉聖旨催促祖禹所編仁宗故事尋以上進訖臣愚竊謂陛下既欲祖述仁廟即須行其實事乃可動民去歲十一月七日曾奏乞放免五穀力勝稅錢蓋謂此事出於天聖附令乃仁宗一代盛

德之事入人至深及物至廣望陛下主張決事尋蒙降  
付三省遂送戶部下轉運司相度必無行理謹昧萬死  
再錄前來劄子繳連進呈伏願聖慈特賜詳覽若謂所  
捐者小所濟者大可以追復仁宗聖政慰答民心即乞  
只作聖意批出施行若謂不然即乞留中更不降出免  
煩勘當取進止

貼黃臣所乞放免五穀力勝稅錢萬一上合聖意有  
可施行欲乞內出指揮大意若曰祖宗舊法本不收

五穀力勝稅錢近乃著令許依例收稅是致商賈無利有無不通豐年則穀賤傷農凶年則遂成饑饉宜令今後不問有無舊例並不得收五穀力勝稅錢仍於課內除豁此一項臣昧死以聞無任戰汗待罪之至

上圓丘合祭六議劄子

元祐八年三月日端明殿學士兼翰林侍讀學士左朝奉郎守禮部尚書蘇軾劄子奏臣伏見九月二十二日



詔書節文俟郊禮畢集官詳議祠皇地祇事及郊祀之  
歲廟饗典禮聞奏者臣恭覩陛下近者至日親祀郊廟  
神祇饗答實蒙休應然則圓丘合祭允當天地之心不  
宜復有改更臣竊惟議者欲變祖宗之舊圓丘祀天而  
不祀地不過以謂冬至祀天於南郊陽時陽位也夏至  
祀地於北郊陰時陰位也以類求神則陽時陽位不可  
以求陰也是大不然冬至南郊既祀上帝則天地百神  
莫不從也古者秋分夕月於西郊亦可謂陰位矣至於

從祀上帝則以冬至而祀月於南郊議者不以為疑今  
皇地祇亦從上帝而合祭於圓丘獨以為不可則過矣  
書曰肆類于上帝禋于六宗望于山川徧于羣神舜之  
受禪也自上帝六宗山川羣神莫不畢告而獨不告地  
祇豈有此理哉武王克商庚戌柴望柴祭上帝也望祭  
山川也一日之間自上帝而及山川必無南北郊之別  
也而獨略地祇豈有此理哉臣以知古者祀上帝則并  
祀地祇矣何以明之詩之序曰昊天有成命郊祀天地

也此乃合祭天地經之明文而說者乃以比之豐年秋  
冬報也曰秋冬各報而皆歌豐年則天地各祀而皆歌  
昊天有成命也是大不然豐年之詩曰豐年多黍多稌  
亦有高廩萬億及秭為酒為醴烝畀祖妣以洽百禮降  
福孔皆歌於秋可也歌於冬亦可也昊天有成命之詩  
曰昊天有成命二后受之成王不敢康夙夜基命宥密  
於緝熙單厥心肆其靖之終篇言天而不及地頌所以  
告神明也未有歌其所不祭祭其所不歌也今祭地於

北郊歌天而不歌地豈有此理也臣以此知周之世祀上帝則地祇在焉歌天而不歌地所以尊上帝故其序曰郊祀天地也春秋書不郊猶三望左氏傳曰望郊之細也說者曰三望太山河海或曰淮海也又或曰分野之星及山川也魯諸侯也故郊之細及其分野山川而已周有天下則郊之細獨不及五嶽四瀆乎嶽瀆猶得從祀而地祇獨不得合祭乎秦燔詩書經籍散亡學者各以意推類而已王鄭賈服之流未必皆得其真臣以

詩書春秋考之則天地合祭久矣議者乃謂合祭天地始於王莽以為不足法臣竊謂禮當論其是非不當以人廢光武皇帝親誅莽者也尚採用元始合祭故事謹按後漢書郊祀志建武二年初制郊兆於洛陽為圓壇八陛中又為重壇天地位其上皆南鄉西上此則漢世合祭天地之明驗也又按水經注伊水東北至洛陽縣圓丘東大魏郊天之所準漢故事為圓壇八陛中又為重壇天地位其上此則魏世合祭天地之明驗也唐睿

宗將有事於南郊賈曾議曰有虞氏禘黃帝而郊嚳夏  
后氏禘黃帝而郊鯀郊之與廟皆有禘禘於廟則祖宗  
合食於太祖禘於郊則地祇羣望皆合於圓丘以始祖  
配享蓋有事祭非常祀也三輔故事祭於圓丘上帝后  
土位皆南面則漢嘗合祭矣時褚无量郭山惲等皆以  
曾言為然明皇天寶元年二月敕曰凡所祠享必在躬  
親朕不親祭禮將有關其皇地祇宜如南郊合祭是月  
二十日合祭天地於南郊自後有事於圓丘皆合祭此

則唐世合祭天地之明驗也。今議者欲冬至祀天夏至祀地，蓋以為用周禮也。臣請言周禮與今禮之別。古者一歲祀天者三，明堂饗帝者一，四時迎氣者五，祭地者二，饗宗廟者四。凡此十五者，皆天子親祭也。而又朝日夕月，四望山川，社稷五祀及羣小祀之類，亦皆親祭。此周禮也。太祖皇帝受天眷命，肇造宋室，建隆初郊先饗宗廟，並祀天地，自真宗以來三歲一郊，必先有事景靈，徧饗太廟，乃祀天地。此國朝之禮也。夫周之禮親祭如

彼其多而歲行之不以為難今之禮親祭如此其少而三歲一行不以為易其故何也古者天子出入儀物不繁兵衛甚簡用財有節而宗廟在大門之內朝諸侯出爵賞必於太廟不止時祭而已天子所治不過王畿千里唯以齊祭禮樂為政事能守此則天下服矣是故歲歲行之率以為常至於後世海內為一四方萬里皆聽命於上幾務之繁億萬倍於古日力有不能給自秦漢以來天子儀物日以滋多有加無損以至於今非復如



古之簡易也。今所行皆非周禮三年一郊。非周禮也。先郊二日而告原廟。一日而祭太廟。非周禮也。郊而肆赦。非周禮也。優賞諸軍。非周禮也。自后妃以下至文武官。皆得蔭補親屬。非周禮也。自宰相宗室以下至百官。皆有賜賚。非周禮也。此皆不改而獨於地祇。則曰周禮不當祭於圓丘。此何義也。議者必曰。今之寒暑與古無異。而宣王薄伐玁狁。六月出師。則夏至之日。何為不可祭乎。臣將應之曰。舜一歲而巡四岳。五月方暑而南至衡。

山十一月方寒而北至常山亦今之寒暑也後世人主能行之乎周所以十二歲一巡者唯不能如舜也夫周已不能行舜之禮而謂今可以行周之禮乎天之寒暑雖同而禮之繁簡則異是以有虞氏之禮夏商有所不能行夏商之禮周有所不能用時不同故也宣王以六月出師驅逐玁狁蓋非得已且吉父為將王不親行也今欲定一代之禮為三歲常行之法豈可以六月出師為比乎議者必又曰夏至不能行禮則遣官攝祭祀亦

有故事此非臣之所知也周禮大宗伯若王不與則攝位鄭氏注曰王有故則代行其祭事賈公彥疏曰有故謂王有疾及哀慘皆是也然則攝事非安吉之禮也後世人主不能歲歲親祭故命有司行事其所從來久矣若親郊之歲遣官攝事是無故而用有故之禮也議者必又曰省去繁文末節則一歲可以再郊臣將應之曰古者以親郊為常理故無繁文今世以親郊為大禮則繁文有不能省也若帷城幔屋盛夏則有風雨之虞陛

下自宮入廟出郊冠通天乘大輅日中而舍百官衛兵  
暴露於道鎧甲具裝人馬喘汗皆非夏至所能堪也王  
者父事天母事地不可偏也事天則備事地則簡是於  
父母有隆殺也豈得以為繁文末節而一切欲省去乎  
國家養兵異於前世自唐之時未有軍賞猶不能歲歲  
親祠天子出郊兵衛不可簡省大輅一動必有賞給今  
三年一郊傾竭帑藏猶恐不足郊賚之外豈可復加若  
一年再賞國力將何以給分而與之人情豈不失望議

者必又曰三年一祀天又三年一祭地此又非臣之所  
知也三年一郊已為疏闊若獨祭地而不祭天是因事  
地而愈疏於事天自古未有六年一祀天者如此則典  
禮愈壞欲復古而背古益遠神祇必不顧饗非所以為  
禮也議者必又曰當郊之歲以十月神州之祭易夏至  
方澤之祀則可以免方暑舉事之患此又非臣之所知  
也夫所以議此者為欲舉從周禮也今以十月易夏至  
以神州代方澤不知此周禮之經耶抑變禮之權也若

變禮從權而可則合祭圓丘何獨不可十月親祭地十一月親祭天先地後天古無是禮而一歲再郊軍國勞費之患尚未免也議者必又曰當郊之歲以夏至祀地祇於方澤上不親郊而通燿火天子於禁中望祀此又非臣之所知也書之望秩周禮之四望春秋之三望皆謂山川在境內而不在四郊者故遠望而祭也今所在之處俛則見地而云望祭是為京師不見地乎此六議者合祭可不之決也夫漢之郊禮尤與古戾唐亦不能

如古本朝祖宗欽崇祭祀儒臣禮官講求損益非不知  
圓丘方澤皆親祭之為是也蓋以時不可行是故參酌  
古今上合典禮下合時宜較其所得已多於漢唐矣天  
地宗廟之祭皆當歲徧令不能歲徧是故徧於三年當  
郊之歲又不能於一歲之中再舉大禮是故徧於三日  
此皆因時制宜雖聖人復起不能易也今並祀不失親  
祭而北郊則必不能親徃二者孰為重乎若一年再郊  
而遣官攝事是長不親事地也三年間郊當行郊地之

歲而暑雨不可親行遣官攝事則是天地皆不親祭也  
夫分祀天地決非今世之所能行議者不過欲於當郊  
之歲祀天地宗廟分而為三耳分而為三有三不可夏  
至之日不可以動大衆舉大禮一也軍賞不可復加二  
也自有國以來天地宗廟唯饗此祭累聖相承唯用此  
禮此乃神祇所歆祖宗所安不可輕動動之則有吉凶  
禍福不可不慮三也凡此三者臣熟計之無一可行之  
理伏請從舊為便昔西漢之哀元帝納貢禹之言毀宗



廟成帝用丞相衡之議改郊位皆有殃咎著於史策往  
鑒甚明可為寒心伏望陛下詳覽臣此章則知合祭天  
地乃是古今正禮本非權宜不獨初郊之歲所當施行  
實為無窮不刊之典願陛下謹守太祖建隆神宗熙寧  
之禮無更改易郊祀廟饗以救寧上下神祇仍乞下臣  
此章付有司集議如有異論即須盡一解破臣所陳六  
議使皆屈伏上合周禮下不為當今軍國之患不可固  
執更不論當今可與不可施行所貴嚴祀大典蚤以時

定取進止

貼黃唐制將有事於南郊則先朝獻太清宮朝享太廟亦如今禮先二日告原廟先一日享太廟然議者或亦以為非三代之禮臣謹按武王克商丁未祀周廟庶戊柴望相去三日則先廟後郊亦三代之禮也

請詰難圓丘六議劄子

元祐八年三月二十二日端明殿學士兼翰林侍讀學士左朝奉郎守禮部尚書蘇軾劄子奏臣近奏論圓丘

合祭天地非獨適時之宜亦自然上合三代六經為萬世不刊之典然臣不敢必以為是故發六議以開異同之端欲望聖旨行下令議者與臣反覆詰難盡此六議之是非而取其通者則其論可得而定也今奉聖旨但云令集議官集議聞奏竊慮議者各伸其意不相詰難則是非可否終莫之決雖聖明必有所擇而人各自為一議但欲遂其前說豈聖朝考禮之本意哉臣今欲乞集議之日若所見不同即須畫一難臣六議明著可否

之狀不得但持一說不相詰難臣非敢自是而求勝也  
蓋欲從長而取通也若議不通敢不廢前說以從衆論  
取進止

乞改居喪婚娶條狀

元祐八年三月日端明殿學士兼翰林侍讀學士左朝  
奉郎守禮部尚書蘇軾狀奏臣伏見元祐五年秋頒條  
貫諸民庶之家祖父母父母老疾謂於法應贖者無人供侍子  
孫居喪者聽尊長自陳驗實婚娶右臣伏以人子居父

母喪不得嫁娶人倫之正王道之本也孟子論禮色之輕重不以所重徇所輕喪三年為二十五月使嫁娶有二十五月之遲此色之輕者也釋喪而婚會鄰於禽犢此禮之重者也先王之政亦有適時從宜者矣然不立居喪嫁娶之法者所害大也近世始立女居父母喪及夫喪而貧乏不能自存並聽百日外嫁娶之法既已害禮傷教矣然猶或可以從權而冒行者以女弱不能自立恐有流落不虞之患也今又使男子為之此何義也

哉男年至於可娶雖無兼侍亦足以養父母矣今使之  
釋喪而婚會是直使民以色廢禮耳豈不過甚矣哉春  
秋禮經記禮之變必曰自某人始使秉直筆者書曰男  
子居父母喪得娶妻自元祐始豈不為當世之病乎臣  
謹按此法本因邛州官吏妄有起請當時法官有失考  
論便為立法臣備位秩宗前日又因邇英進讀論及此  
事不敢不奏伏望聖慈特降指揮削去上條稍正禮俗  
謹錄奏聞伏候勅旨



東坡全集卷六十三

欽定四庫全書

集部

東坡全集卷六十四

五

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官待詔臣胡士震

謄錄監生臣范世業



欽定四庫全書

東坡全集卷六十四

宋 蘇軾 撰

奏議一十首

奏馬澈不當屏出學狀

元祐八年四月日端明殿學士兼翰林侍讀學士左朝奉郎守禮部尚書蘇軾狀奏准太學條三學生凡有進獻文字及書啟贊有位並先經長貳看詳可否違者出學右本部看詳諸色人苟有所見公私利害皆得進狀

許直於所屬官司投下即無更令官吏看詳可否方得  
投進之文所以達聰明防壅蔽古今不易之道也本因  
國子監生員獨緣本監起請遂立上條曲生防禁至於  
投獻書啟文字求知公卿此正舉人常事今乃使本監  
長貳先行看詳違者皆屏出學若論列朝政得失使其  
言當理固人主所欲聞也若不當理亦人主所當容也  
今乃先令有司看詳去取甚非子產不毀鄉校魏相去  
副封之意也去年九月內太學內舍生馬澈進狀論禮

部韻畧有疎畧未盡事件蒙朝廷送下本部謹接澈所  
論文指雅馴考驗經史皆有援據此乃內舍生員之優  
者教養之官所當愛惜而其所論亦當下有司詳議增  
損施行本部尋下本監勘當准回申已於十二月內檢  
舉上條其馬澈已屏出學以此顯見上條無益有害欲  
乞朝廷詳酌特與刪除不行仍乞依舊令馬澈充內舍  
生其所進狀乞行下有司看詳如有可采乞賜施行謹  
錄奏聞伏候敕旨

乞校正陸贄奏議上進劄子

元祐八年五月七日端明殿學士兼翰林侍讀學士左  
朝奉郎守禮部尚書蘇軾同呂希哲吳安詩豐稷趙  
彥若范祖禹顧臨劄子奏臣等猥以空疎備員講讀聖  
明天縱學問日新臣等才有限而道無窮心欲言而口  
不逮以此自愧莫知所為竊謂人臣之納忠譬如醫者  
之用藥藥雖進於醫手方多傳於古人若已經效於世  
間不必皆從於已出伏見唐宰相陸贄才本王佐學為

帝師論深切於事情言不離於道德智如子房而文則  
過辯如賈誼而術不踈上以格君心之非下以通天下  
之志三代以還一人而已但其不幸仕不遇時德宗以  
苛刻為能而贊諫之以忠厚德宗以猜疑為術而贊勸  
之以推誠德宗好用兵而贊以消兵為先德宗好聚財  
而贊以散財為急至於用人聽言之法治邊馭將之方  
罪已以收人心改過以應天道去小人以除民患惜名  
器以待有功如此之流未易悉數可謂進苦口之藥石

鍼害身之膏肓使德宗盡用其言則貞觀可得而復臣  
等每退自西閣即私相告言以陛下聖明必喜贊議論  
但使聖賢之相契即如臣主之同時昔馮唐論頗牧之  
賢則漢文為之太息魏相條鼂董之對則孝宣以致中  
興若陛下能自得師莫若近取諸贊夫六經三史諸子  
百家非無可觀皆足為治但聖言幽遠末學支離譬如  
山海之崇深難以一二而推擇如贊之論開卷了然聚  
古今之精英實治亂之龜鑑臣等欲取其奏議稍加校

正繕寫進呈願陛下置之坐隅如見贊面反覆熟讀如與贊言必能發聖性之高明成治功於歲月臣等不勝區區之意取進止

辨黃慶基彈劾劄子

元祐八年五月十九日端明殿學士兼翰林侍讀學士左朝奉郎守禮部尚書蘇軾劄子奏臣自少年從仕以來以剛褊疾惡盡言孤立為累朝人主所知然亦以此見疾於羣小其來久矣自熙寧元豐間為李定舒亶輩

所讒及元祐以來朱光庭趙挺之賈易之流皆以誹謗之罪誣臣前後相傳專用此術朝廷上下所共明知然小人非此無以深入臣罪故其計須至出此今者又聞臺官黃慶基復祖述李定朱光庭賈易等舊說亦以此誣臣并言臣有妄用潁州官錢失入尹真死罪及強買姓曹人田等雖知朝廷已察其姦罷黜其人矣然其間有關臣子之大節者於義不可不辨謹具畫一如左

一臣先任中書舍人日適值朝廷竄逐大奸數人所



行告詞皆是元降詞頭所述罪狀非臣私意所敢  
增損內呂惠卿自前執政責授散官安置誅罰至  
重當時蒙朝旨節錄臺諫所言惠卿罪惡降下既  
是詞頭所有則臣安敢減落然臣子之意以為事  
涉先朝不無所忌故特於告詞內分別解說今天  
下曉然知是惠卿之奸而非先朝盛德之累至於  
竄逐之意則已見於先朝其畧曰先皇帝求賢若  
不及從善如轉圜始以帝堯之心姑試伯鯀終然孔

子之聖不信宰予發其宿奸謫之輔郡尚疑改過  
稍畀重權復陳罔上之言繼有碭山之貶反覆教  
戒惡心不悛躁輕矯誣德音猶在臣之愚意以謂  
古今如鯀為堯之大臣而不害堯之仁宰予為孔  
子高弟而不害孔子之聖又況再加貶黜深惡其  
人皆先朝本意則臣區區之忠蓋自謂無負矣今  
慶基乃反指以為誹謗指斥不亦矯誣之甚乎其  
餘所言李之純蘇頌劉誼唐義問等告詞皆是

慶基文致附會以成臣罪只如其間有勞來安集  
四字便云是厲王之亂若一一似此羅織人言則  
天下之人更不敢開口動筆矣孔子作孝經曰如  
臨深淵如履薄冰此幽王之詩也不知孔子誹謗  
指斥何人乎此風萌於朱光庭盛於趙挺之而極  
於賈易今慶基復宗師之臣恐陰中之害漸不  
可長非獨為臣而言也

一慶基所言臣行陸師閔告詞云侵漁百端怨讟四

作亦謂之謗訕指斥此詞元不是臣行中書案底必自有主名可以覆驗顯是當時掌誥之臣凡有竄逐之人皆似此罪狀其事非獨臣也所謂侵漁怨讟者意亦指言師閔而已何名為謗訕指斥乎慶基以他人之詞移為臣罪其欺罔類皆如此

一慶基所言臣妄用潁州官錢此事見蒙尚書省勘會次然所用皆是法外支賞令人告捕強惡賊人及逐急將還前知州任內公使庫所少貧下行人

錢物情理如此皆可覆驗

一慶基所言臣強買常州宜興縣姓曹人田地八年  
州縣方與斷還此事元係臣任團練副使日罪廢  
之中託親識投狀依條買得姓曹人一契田地後  
來姓曹人却來臣處昏賴爭奪臣即時牒本路轉  
運司令依公盡理根勘仍便具狀申尚書省後來  
轉運司差官勘得姓曹人招服非理昏賴依法決  
訖其田依舊合是臣為主牒臣照會臣慙見小民

無知意在得財臣既備位侍從不欲與之計較曲直故於招服斷遣之後却許姓曹人將元價收贖仍亦申尚書省及牒本路施行今慶基乃言是本縣斷還本人顯是誣罔今來公案見在戶部可以取索案驗

一慶基所言臣在潁州失入尹真死罪此事已經刑部定奪不是失入却是提刑蔣之翰妄有按舉公案具在刑部可以覆驗

右臣竊料慶基所以誣臣者非一臣既不能盡知又今來朝廷已知其姦妄而罷黜其人臣不當一一辯論但人臣之義以名節為重須至上煩天聽取進止

謝宣諭劄子

元祐八年五月二十四日端明殿學士兼翰林院侍讀學士左朝奉郎守禮部尚書蘇軾劄子奏臣伏准今月二十二日弟門下侍郎轍奉宣聖旨緣近來衆人正相摭拾令臣且須省事者天慈深厚如訓子孫委曲保全

如愛肢體感恩之涕不覺自零伏念臣才短數竒性疎  
少慮半生犯患垂老因讒非二聖之深知雖百死而何  
贖伏見東漢孔融才疏意廣負氣不屈是以遭路粹之  
寃西晉嵇康才多識寡好善闇人是以遇鍾會之禍當  
時為之扼腕千古為之流涕臣本無二子之長而兼有  
昔人之短若非陛下至公而行之以恕至仁而照之以  
明察消長之徃來辨利害於疑似則臣已下從二子遊  
久矣豈復有今日哉謹當奉以周旋不敢失墜便須刻骨



豈獨書紳庶全螻蟻之軀以報丘山之德臣無任感天  
荷聖激切屏營之至謹奏

奏乞增廣貢舉出題劄子

元祐八年五月二十六日端明殿學士兼翰林侍讀學  
士左朝奉郎守禮部尚書蘇軾劄子奏臣伏見元祐貢  
舉敕諸詩賦論題於子史書出

唯不得於  
老莊子出

如於經書出

而不犯見試舉人所治之經者亦聽

謂如引試治詩書  
舉人即聽於易春

秋經傳出詩賦論題引試治易春秋舉  
人即聽於周禮禮記出詩賦論題之類臣竊謂自來詩

賦論題雜出於九經考經論語注中文字浩博有可選擇久而不窮今詳上條止得於子史書出所取者狹雖聽於經書出又須不犯見試舉人所治之經如是在京試院分經引試可以就別經出題至如外州軍只作一場引試即須回避只如子史中出恐非經久之法臣今相度欲乞詩賦論題許於九經考經論語子史并九經論語注中雜出更不避見試舉人所治之經但須於所給印紙題目下備錄上下全文并注疏不得漏落則本

經與非本經舉人所記均一更無可避兼足以稱朝廷待士之意本只以工拙為去取不以不全之文掩其所不知以為進退於忠厚之風不為無補取進止

申省議讀漢唐正史狀

元祐八年八月十九日端明殿學士兼翰林侍讀學士左朝奉郎守禮部尚書蘇軾同顧臨趙彥若狀申昨准內降宰臣呂大防劄子奏臣每旬獲侍經筵竊見進讀五朝寶訓將欲了畢自來多用前代正史進讀竊謂其

間有不足上煩聖覽者欲乞指揮講讀官同將漢唐正史內可以進讀事迹鈔節成篇遇讀日進呈敷演庶裨聖治取進止奉御寶批依奏右軾等今已鈔節繕寫稍成卷秩於將來開講日進讀即未審與五朝寶訓並進為復間日一讀謹具申尚書省伏候指揮

朝辭赴定州論事狀

元祐八年九月二十六日端明殿學士兼翰林侍讀學士左朝奉郎新知定州蘇軾狀奏右臣聞天下治亂出

於下情之通塞至治之極至於小民皆能自通大亂之極至於近臣不能自達易曰天地交泰其詞曰上下交而其志同又曰天地不交否其詞曰上下不交而天下無邦夫無邦者亡國之謂也上下不交則雖有朝廷君臣而亡國之形已具矣可不畏哉臣不敢復引衰世昏主之事只如唐明皇中興刑措之君也而天寶之末小人在位下情不通則鮮于仲通以二十萬人全軍陷沒於瀘南明皇不知馴致其事至安祿山反兵已過河而

明皇猶以為忠臣此無他下情不通耳目壅蔽則其漸至於此也臣在經筵數論此事陛下為政九年除執政臺諫外未嘗與羣臣接然天下不以為非者以謂垂簾之際不得不爾也今者祥除之後聽政之初當以通下情除壅蔽為急務臣雖不肖蒙陛下擢為河北西路安撫使沿邊重地此為首冠臣當悉心論奏陛下亦當垂意聽納祖宗之法邊帥當上殿面辭而陛下獨以本任闕官迎接人衆為詞降旨拒臣不令上殿此何義也臣

若伺候上殿不過更留十日本任闕官自有轉運使權攝無所闕事迎接人衆不過更支十日糧有何不可而使聽政之初將帥不得一面天顏而去有識之士皆謂陛下厭聞人言意輕邊事其兆見於此矣臣備位講讀日侍帷幄前後五年可謂親近方當戍邊不得一見而行況疎遠小臣欲求自通亦難矣易曰天行健君子以自強不息又曰帝出乎震相見乎離夫聖人作而萬物覩今陛下聽政之初不行乘乾出震見離之道廢祖宗

臨遣將帥故事而襲行垂簾不得已之政此朝廷有識所以驚疑而憂慮也臣不得上殿於臣之私別無利害而於聽政之始天下屬目之際所損聖德不小臣已於今月二十七日出門非敢求登對然臣始者本俟上殿欲少效愚忠今來不敢以不得對之故便廢此言惟陛下察臣誠心少加採納古之聖人將有為也必先處晦而觀光處靜而觀動則萬物之情畢陳于前不過數年自然知利害之真識邪正之實然後應物而作故作無



不成臣敢以小事譬之夫操舟者常患不見水道之曲折而水濱之立觀者常見之何則操舟者身寄於動而立觀者常靜故也奕碁者勝負之形雖國工有所不盡而袖手旁觀者常盡之何則奕者有意於爭而旁觀者無心故也若人主常靜而無心天下其孰能欺之漢景帝即位之初首用鼂錯更易法令黜削諸侯遂成七國之變景帝往來兩宮間寒心者數月終身不敢復言兵武帝即位未幾遂欲用兵鞭撻四夷兵連禍結三十餘

年然後下哀痛詔封宰相為富民侯臣以此知古者英  
睿之君勇於立事未有不悔者也景帝之悔速故變而  
復安武帝之悔遲故幾至於亂雖遲速安危小異然比  
之常靜無心終始不悔如孝文帝者不可同年而語矣  
今陛下聖智絕人春秋鼎盛臣願虛心循理一切未有  
所為默觀庶事之利害與羣臣之邪正以三年為期俟  
得利害之真邪正之實然後應物而作使既作之後天  
下無恨陛下亦無悔上下同享太平之利則雖盡南山

之竹不足以紀聖功兼三宗之壽不足以報聖德由此  
觀之陛下之有為惟憂太早不患稍遲亦已明矣臣又  
聞為政如用藥方今天下雖未大治實無大病古人云  
有病不治常得中醫雖未能盡除小疾然賢於誤服惡  
藥覬萬一之利而得不救之禍者遠矣臣恐急進好利  
之臣輒勸陛下輕有改變故輒進此說敢望陛下深信  
古語且守中醫安穩萬全之策勿為惡藥所誤實社稷  
宗廟之利天下幸甚臣不勝忘身憂國之心冒死進言

謹錄奏聞伏候敕旨

乞降度牒修定州禁軍營房狀

元祐八年十月日端明殿學士兼翰林侍讀學士左朝奉郎知定州蘇軾狀奏臣伏見定州近歲軍政不嚴邊備小弛事不可悉數請舉一二如甲仗庫子軍人張全一年之間持仗入庫前後盜銅鑼十二面監官明知並不申舉又有帳設什物庫子軍人田平等二年之間盜帳設什物八百餘件銀二百五十餘兩恣意典賣軍城

寨人戶採斫禁山開耕為田公然起稅住坐者一百八十餘家城中有開樞坊人百餘戶明出牌榜召軍民賭博若此之類未易悉數是致法令不行禁軍日有逃亡聚為盜賊民不安居臣到任以來備見其事然不欲驟行峻治但因事行法無所貸捨其上件張全田平等皆以付獄按治侵斫禁山人逐次舉覺依法勘斷張德等九人其多年侵耕已成永業者別作擘劃處置申樞密院次開樞坊人出榜召人告捉有王京等四十家陳首

改業其餘並走出州界軍民自此稍知有朝廷法令逃  
軍衰少賊盜亦稀臣近令所辟幕官李之儀孫敏行徧  
徃諸營點檢據逐官回申營房大段損壞不庇風雨非  
惟久不修葺蓋是元初創造材植怯弱人工因循多是  
兩椽小屋偷地蓋造椽柱腐爛大半無瓦一牀一竈之  
外轉動不得之儀等又點檢得諸營軍號例皆暗敝妻  
子凍餒十有五六臣尋體問得蓋是將校不法乞取歛  
掠坐放債負身既不正難以戢下是致諸軍公然飲博

踰濫三事不禁雖上禁軍無不貧困輕生犯法靡所不至若不按發其太甚者無以警衆革弊已體量得雲翼指揮使孫貴到營四箇月前後斂掠一十一度計入已贓九十八貫八百文已送司理院枷項限勘去訖臣既目覩媮弊理合葺治犯法之人絲毫無貸即須恤其有無同其苦樂豈可身居大厦而使士卒終年處於偷地破屋之中上漏下濕不安其家輒已差將官李巽錢春卿劉世孫將帶人匠徧詣諸營逐一檢計合修去處具

合用材料人工估見的確錢數仍差本司準備勾當供奉官石昇躬親再行覆檢到除與逐將所檢合修營房間架材木等並同外又據本官檢料到更合修蓋營房一十六間謹具畫一奏聞如後

一河北第一將檢計到本將下所管定州住營馬步禁軍八指揮合行修蓋營房共四千一百一十七間據合用材植物料紐估到計使價錢一萬七千六百九貫六百八十文省



一河北第二將檢計到本將下所管定州住營馬步  
禁軍八指揮合行修蓋營房共三千七百二十間  
據合用材植物料紐估到計使價錢一萬五千五  
貫二百八十一文省

一檢計到不隸將下所管定州營步軍振武第四十  
五指揮合行修蓋營房一百一十八間并合添井  
眼據合用材植物料紐估到計使價錢五百五十  
八貫一百六十七文省

一本司准備勾當供奉官石昇檢料更合修蓋第一  
第二將下諸軍營房共一十六間據合用材植物  
料紐估到計使價錢七十四貫六百一十二文省  
右謹件如前臣竊謂上件合用錢數雖當破係省錢又  
緣河北轉運司近年財賦窘迫必難支破伏望聖慈深  
念河朔為諸路要重而定武控扼強隣又為河北屏捍  
所屯兵馬理當加意葺治其上件營房不可不於今年  
秋冬便行修蓋欲乞特出聖斷支賜空名度牒一百七

十一道委本司召人出賣一面置場和買材料燒造磚瓦和雇人匠節次不住修蓋施行所有逐將及本司准備勾當官石昇檢計到諸軍合蓋營房間架材植物料等細數文狀四本繳進在前謹錄奏聞伏候勅旨

貼黃勘會度牒一百七十一道係將前項檢計到的確物料錢數契勘合用道數外計剩錢五十二貫二百五十八文欲乞就整支降

乞增修弓箭社條約狀二首

元祐八年十一月十一日端明殿學士兼翰林院侍讀學士左朝奉郎知定州蘇軾狀奏臣竊見契丹久和河朔無事沿邊諸郡軍政少弛將驕卒惰緩急恐不可用武藝軍裝皆不逮陝西河東遠甚雖據即日邊防事勢三五年間必無警急然居安慮危有國之常備事不素講難以應猝今者河朔沿邊諸軍未嘗出征終年坐食理合富强臣近遣所辟幕官李之儀孫敏行親入諸營按視曲折審知禁軍大率貧窘妻子赤露饑寒十有六

七屋舍大壞不庇風雨體問其故蓋是將校不肅斂掠  
乞取坐放債負習以成風將校既先違法不公則軍政  
無緣修舉所以軍人例皆飲博踰濫三事不止雖是禁  
軍不免寒餓既輕犯法動輒逃亡此豈久安之道

貼黃所謂

軍政不脩皆有實狀不敢一一奏聞

臣自到任漸次申嚴軍法逃軍盜賊

已覺衰少年歲之間庶革此風然臣竊謂沿邊禁軍緩  
急終不可用何也驕惰既久膽力耗憊雖近戍短使輒  
與妻孥泣別被甲持兵行數十里即便喘汗臣若嚴加

訓練晝夜勤習馳驟坐作使耐辛苦則此聲先馳契丹  
疑畏或致生事臣觀祖宗以來沿邊要害屯聚重兵止  
以壯國威而消敵謀蓋所謂先聲後實形格勢禁之道  
耳若進取深入交鋒兩陣猶當雜用禁旅至於平日保  
境備禦小事即須專用極邊土人此古今不易之論也  
鼂錯與漢文帝畫備邊策不過二事其一曰徙遠方以  
實廣虛其二曰制邊縣以備敵竇元慶歷中趙元昊反  
屯兵四十餘萬招刺宣毅保捷二十五萬人皆不得其

用卒無成功范仲淹劉滄种世衡等專務整緝蕃漢熟  
戶弓箭手所以封殖其家砥礪其人者非一道藩籬既  
成賊來無所得故元昊復臣今河朔西路被邊州軍自  
澶淵講和以來百姓自相團結為弓箭社不論家業高  
下戶出一人又自相推擇家資武藝衆所服者為社頭  
社副錄事謂之頭目帶弓而鋤佩劍而樵出入山坂飲  
食長技與契丹同私立賞罰嚴於官府分番巡邏鋪屋  
相望若透漏北人及本土強盜不獲其當番人皆有重

罰遇有緊急擊鼓集衆頃刻可致千人器甲鞍馬常若有警蓋親戚墳墓所在人自為戰敵甚畏之體問得元豐二年北界羣賊一火約二十餘人在兩界首不住打劫為患久不敗獲有北平軍大悲村本社頭目冉萬冉昇及長行冉捷等部領社人與北賊鬪敵趕趁捉殺直至北界地名北當山峪內被冉萬射中賊頭徐德冉捷趕上斫獲首級并冉昇亦斫到第二賊頭賈貴本路保明申奏朝廷並已於班行內安排以此知弓箭社人戶



驍勇敢戰緩急可用先朝名臣帥定州者如韓琦龐籍  
皆加意拊循其人以為爪牙耳目之用而籍又增損其  
約束賞罰奏得仁宗皇帝聖旨見今具存

貼黃所有龐籍奏得聖旨

已具錄緣連在前

昨於熙寧六年行保甲法準當年十二月四

日聖旨強壯弓箭社並行廢罷又至熙寧七年再准正  
月十九日中書劄子聖旨應兩地供輸人戶除元有弓  
箭社強壯義勇之類並依舊存留外更不編排保甲看  
詳上件兩次聖旨除兩地供輸村分方許依舊置弓箭

社其餘並合廢罷雖有上件指揮公私相承元不廢罷只是令弓箭社兩丁以上人戶兼充保甲以致逐捕本界及化外盜賊並皆驅使弓箭社人戶向前用命捉殺貼黃前項所奏元豐二年再萬等捉殺北賊係熙寧六年朝旨廢罷後兼再萬等不係兩地供輸是合行廢罷地分見今州縣委實全藉此等寅夜防把顯見弓箭社實為邊防要用其勢決不可廢但以兼充保甲之故召集追呼勞費失業今雖名目具存責其實用不逮往日臣竊謂陝西河東弓箭手官給良田以備甲馬今河朔

沿邊弓箭社皆是人戶祖業田產官無絲毫之給而捐  
軀捍邊器甲鞍馬與陝西河東無異苦樂相遼未盡其  
用近日霸州文安縣及真定府北寨皆有北人驚劫人  
戶捕盜官吏拱手相視無如之何以驗禁軍弓手皆不  
得力向使州縣逐處皆有弓箭社人戶致命盡力則北  
人豈敢輕犯邊塞如入無人之境臣已戒飭本路將吏  
申嚴賞罰加意拊循其人去訖輒復拾用龐籍舊奏約  
束稍加增損別立條目欲乞朝廷立法少賜優異明設

賞罰以示懲勸今已密切取會到本路極邊定保兩州  
安肅廣信順安三軍邊面七縣一寨內管自來團結弓  
箭社五百八十八村六百五十一火共計三萬一千四  
百一十一人若朝廷以為可行立法之後更敕將吏常  
加拊循使三萬餘人分番晝夜巡邏盜邊小寇來即擒  
獲不至忸怩以生戎心而事皆循舊無所改作敵不疑  
畏無由生事有利無害較然可見謹具所乞立法事件  
畫一如左

一看詳嘉祐四年龐籍起請已獲朝旨事件除見可  
施行外有當時事體與今來稍有不同須至少有  
增損今參詳到下項弓箭社人戶但係久來團結  
地分並依見今已行體例不拘物產高下丁口衆  
寡並每戶選擇強壯一丁充弓箭手

貼黃高強人戶與下等各出一丁雖似不均緣行之  
已久下等人戶無詞乞具一切仍舊若上戶添差人  
數即恐行法之初人心不安又緣保甲法雖上戶亦

止一丁所以今來不敢增損

每社置社長社副社錄事各一名為頭目並選有物力或好人材事藝衆所推服者方得差補農事餘暇委頭目常切提舉閱習武藝務令精熟齊整如無盜賊非時不得勾集

每社及百人以上選少壯者三人不滿百人者選二人不滿五十人者選一人充急脚子並輪番一月一替專令探報盜賊如探報不實及稽留後時有誤捕

捉者並申官乞行嚴斷

逐社各置鼓一面如有事故及盜賊並須聲鼓勾集  
若尋常社內聲鼓不到者每次罰錢一百如社內一  
兩村共為一火地理稍遠不聞鼓聲去處即火急差  
急脚子勾喚若強盜入村聲鼓勾喚不到及到而不  
入賊者並罰錢三貫如三經罰錢一百一經罰錢三  
貫而各再犯者並送所屬嚴斷

如能捉獲強盜一名除依條支賞外更支錢二十貫

如兩次捉獲依前支賞外仍與免戶下一年差徭如  
三次以上更免一年無差徭可免者各更支錢十貫  
折充如獲竊盜一名除依條支賞外更支錢二貫以  
上錢用社內罰錢充如不足並社衆拘備

逐社各人置弓一張箭三十隻刀一口內單丁及貧  
不及辦者許置鎗及桿棒一條內一件不足者罰錢  
五百弓箭不堪施放器械雖有而不精並罰錢二百  
若全然不置者即申送所屬乞行勘斷



逐社每夜輪差一十人於地分內往來巡覷仍本縣  
每季給厯一道委本社頭目抄上當巡人姓名有不  
到者罰錢二百如本地分失賊其當巡人委本社監  
勒依條限捕捉限滿不獲送官量事行遣其所給厯  
除每季納換及知佐下鄉因便點檢外不得非時取  
索

弓箭社人戶遇出入經宿以上須告報本社頭目及  
隣近同保之人違者罰錢三百文

社內遇捉殺賊盜因鬪致死除依條官給絹外更給錢一十貫付其家被傷重者減半並以係省錢充

社內所納罰錢令社長等同共封記主管須遇社會合行酬賞者方得對衆支給破使即不得衷私別作支用

社內遇豐熟年只得春秋二社聚會因便點集器械非時不得亂有糾集搔擾

已上並是龐籍起請已獲朝旨事件自熙寧六年

聖旨廢罷後來民間依舊衷私施行今參詳增損  
修定

一弓箭社人戶為與契丹為鄰各自守護骨肉墳墓  
曉夜不住巡邏探伺以此巡檢縣尉全藉此人為  
耳目肘臂之用每遇冬教內有本社弓箭人戶見  
係保甲人數者即須勾上一月教閱其稱捕盜官  
司不敢放心以至化外賊盜既知逐社人勾上村  
堡空虛即皆生心窺伺公私憂恐又人戶勾集彌

月諸般費用不少深為患苦臣竊謂保甲人戶每年冬教本為恐其因循武藝生疎緩急難用今來弓箭社人戶既處邊塞與北人氣俗相似以戰鬪為生寢食起居不釋弓馬出入守望常帶器械其勢無由生疎欲乞應弓箭人戶今後更不充保甲仍免冬教

貼黃保甲法須是主戶兩丁以上方始差充其弓箭社一丁以上並差即無已

充保甲而不充弓箭社人戶者今來所乞本社內人戶更不充保甲只是減罷重疊虛名即非幸免

顯無妨礙而使人戶稍免無益之費專心守禦又

免教集之月村堡空虛以生戎心公私安枕為利  
不淺其減罷保正長並却令充本社守關頭目  
一弓箭社人戶既任透漏失賊之責動輒罰錢科罪  
及均出賞錢顯見與其餘人戶苦樂不同理合稍  
加優異欲乞應弓箭社人戶並免兩稅折變科配  
今已取會到本路州軍所免折科錢物數目比之和  
買價例每歲剩費錢七千九百九十八貫五十六  
文所獲精銳可用民兵三萬餘人費小利大可行

無疑

一弓箭社頭目並是鄉村有物力心膽之人責以齊衆保境亦須別加旌勸欲乞立定年限每勾當及三年如無透漏及私罪情重者委本縣令佐及捕盜官保明申安撫司給與公據公罪杖以下聽贖又及三年無上件過犯仍與保明給公據與免本戶差徭內別有功勞者委自安撫司相度如委是卓然顯效雖未及上件年限亦與比類施行若更

有大段勞績難以常格論賞者即委自本司奏乞  
錄用

一弓箭社地分本係人戶私下情願自相團結皆是  
緣邊之人衆共相約要害防把之處行之已久契  
丹不疑所以龐籍奏請並是因舊畧加約束今來  
不可更有移易地分及增添團結去處永遠只以  
今來所管五百八十八村為定所貴事事循舊不  
至張皇生事如本地分內人戶分煙析生即各據

戶眼定差或外來人戶典買到本社田地亦許收  
入差充弓箭社戶若兩處有田產者不得緣此帶  
免別處折變委所屬官司常切覺察

貼黃弓箭社五百八十八村內有八十九村係兩地  
供輸人戶勘會上件人戶元是有些小虛名稅賦自  
來北界差人過來計會本縣收衆戶抱脚供輸其人  
戶並是一心捍邊可信之人切慮朝廷欲知其實

一今來既立法整齊弓箭社人戶及免冬教即須委



自安撫司逐時差官按視內有武藝膽力出衆之人即須與例物激賞不惟使人戶競勸亦所以致朝廷及將帥恩意緩急易為驅使今取會到轄下兩州三軍弓箭社人戶兼充保甲者每年冬教按賞合用錢一千五百八十二貫七百八十八文今來既免冬教即保甲司却合出備上件錢數與安撫司為上件激賞之用但人數既多上件錢數微少支用不足欲乞每年破五千貫除上件錢數外

其餘並以本路回易庫見在錢貼支

右謹件如前臣竊見西山之下定保之間山開川平無  
陂塘之險澶淵之役敵自是深入見今本路只有戰兵  
二萬五千九百餘人分屯八州軍若有警急尚不足於  
守而況戰乎論者或以保甲之衆緩急可恃臣竊謂保  
甲皆齊民也集教止是一月武藝無緣精熟又平時無  
絲毫之利有得於官每歲所獲按賞例物不償集教一  
月之費一旦驅之於戰守死地恐未可保惟弓箭社人

戶所處皆必爭之地世世相傳結髮與敵戰若朝廷許  
依臣所乞少有以優異其人既免折科間復贖罪免役  
歲以五十緡賞其尤異者深致朝廷將帥恩意則此三  
萬餘人真久遠可恃者也今錄白到嘉祐四年龐籍奏  
獲聖旨事件兼取會到本路兩州三軍弓箭社火人數  
及免折科每年和買費用錢數并免冬教所省按賞例  
物數目繳連在前仍畫到地圖一面帖出接連邊面及  
逐社住坐去處隨狀進呈伏望聖慈詳酌施行謹錄奏

聞伏候敕旨

貼黃所乞免折科却行和買剝費錢七千九百九十  
八貫五十六文所乞以回易庫錢貼支保甲按賞錢  
為五千貫令安撫司支用計費錢三千四百一十七  
貫二百一十二文共計錢一萬一千四百一十五貫  
二百六十八文所乞至微恐不贍於用未足以起士  
氣但臣不敢多乞耳若朝廷深念北邊事大此三萬  
餘人久遠必大段得力更賜擘畫錢物應副成就或

於近裏州軍趨那寬剝免役六色錢與本路被邊州  
軍添雇諸色役人其弓箭社人戶並與免役則人情  
翕然歸戴願效死而不可得矣更乞朝廷詳酌又今  
來所乞事件先已密切下本路近地州軍官吏相度  
利害尋皆供到有利無害經久可行保明文狀在本  
司訖

又

元祐八年十一月日端明殿學士兼翰林侍讀學士左

朝奉郎知定州蘇軾狀奏右臣近奏乞脩完極邊弓箭社條約已詳具利害於今月十一日入遞去訖臣自到任以來不住令主管衙前引到北人訪問事宜雖虛實難明然前後參驗亦可見其畧大抵契丹近歲多為小國塔坦珠保之類所叛破軍殺將非一近據北人契丹四格探報北界為差發兵馬及人戶家丁往招州以來收殺珠保等國及為近年不熟是致朔易武州皆有強賊兼燕京東北白浮圖碇東惡山內有強賊一火約百

五十人不住打劫及又據北平軍申據勾當事人李堅等體探得北界昨差往西北路去者兵士并百姓等近有逃背落草四十餘人馬二十匹見在狼山西頭君市等村乞食竊慮來南界別作過犯雖未見的實然去歲之冬霸州文安縣被北軍殺人劫物朝廷已知其詳及真定府北寨於去年八月今年二月兩次被北軍羣衆打劫近又訪聞代州胡谷寨莎泉堡有北軍六七十人劫掠本堡居人財物殺傷弓箭手及婦女七八人及至

捕盜官會賊已去矣臨去說與鋪兵我只在你的地裏

待更來打赤岸村

貼黃本路副總管王先祖有男見任胡谷寨主家書報先祖臣所以備知

其詳以此數事參驗顯見契丹見今兵困於小國調發頻

併民不堪命聚為盜賊雖鄰境多故實中國之利必無

渝盟之憂然盜賊充斥彼自不能制其餘波末流必延

及吾境若邊臣坐觀不先事設備則邊民無由安居亦

恐更生意外之患若督迫捕盜官吏帶領兵甲曉夜出

入巡邏則賊未必獲而居民先受其擾又或緣此引惹



生事臣再三思慮惟有整葺弓箭社一事名不張皇  
其實可用若早獲朝旨施行令臣更加意拊循激勵其  
人決可使外賊望風知畏不敢於地分內作過伏乞聖  
明特賜詳酌檢會前奏早降指揮謹錄奏聞伏候敕旨

東坡全集卷六十四

欽定四庫全書

東坡全集卷六十五

宋 蘇軾 撰

奏議一十七首

乞減價糶常平米賑濟狀

紹聖元年正月日端明殿學士兼翰林侍讀學士左朝奉郎知定州蘇軾狀奏勘會元祐八年河北諸路並係災傷內定州一路雖只是雨水為害然其實亦及五分以上只緣有司出納之吝不與盡實檢放秋稅內定州

只放二分自臣到任後累有人戶披訴乞倚閣又緣已過條限致難施行今體問得春夏之交人戶委是闕食既非河水災傷即每事只依編敕指揮欲坐觀不救恐非朝廷仁聖本意臣欲便將常平斛斛借貸雖已有成法不煩奏請又體問得河北沿邊人戶為見朝廷昔年遣使賑濟不問人戶高下願與不願借請一例散貸後來節次倚閣放免以此愚民生心僥倖每有借貸例不肯及時還納多是拖欠指望倚閣放免既煩鞭撻追呼

使吏卒因緣為奸畢竟不免失陷官物兼約度得本州  
自第四等以下每戶貸兩石官破十萬石不過濟得五  
萬戶人戶請納耗費房店宿食不過得一石五斗入口  
未必能濟活一家而五萬戶之外人戶更不沾惠鞭撻  
驅催若得健吏亦不過收得十七其失陷三萬石可必  
也又欲抄劄飢貧奏乞法外賑濟不惟所費浩大有出  
無收而此聲一布飢貧雲集盜賊疾疫客主俱斃又況  
准條邊郡不得聚集飢民以上二事既皆不便只有依

條將常平斛斗依價出糶即官司簡便不勞抄劄勘會  
給納煩費但得數萬石斛斗在市自然壓下物價境內  
百姓人人受賜古今之法莫良於此但以本州見管常  
平米二十七萬餘石每斛衮紐到元本一百四文比在  
市實直尚多二十二文以此無人收糶若不別作奏請  
專守本條不與減價出糶深恐今年春夏新陳不接之  
際必致大段流殍伏望聖慈愍念比之本州將十萬石  
常平米依條借貸必須失陷三萬餘石非惟所給不廣

而給納驅催之弊亦多特許將本路諸州軍見管常平  
米契勘在市實直知委是價高出糶不行即許每斛於  
衮紐價錢上減錢出糶不得減過十分之二仍給與貧  
民厯頭令每日零買不得令近上人戶頓買興販仍限  
不得糶過本州縣見管常平數目三分之一約度定州  
合糶得九萬石若每斛各減錢十分之二即本州紐計  
虧元本官錢一萬八千七十二貫文比之借貸失陷猶  
為省費而本州裏外出九萬石米在市則一境生靈皆

荷聖恩全活又却得錢準備將來豐熟物賤却行收糶兼利農末為惠不小者右伏乞朝廷詳酌早賜施行如以為便即乞行下本司約束覺察轄下官吏所貴人沾實惠謹錄奏聞伏候敕旨

貼黃契勘在市米價日長正是二月間合行出糶伏乞速賜指揮入急遞行下

乞將損弱米貸與上戶令賑濟佃客狀

紹聖元年二月日端明殿學士兼翰林侍讀學士左朝



奉郎知定州蘇軾狀奏右臣契勘本路州軍災傷闕食  
人戶雖已奏准朝旨於法外減價出糶常平白米賑濟  
訪聞民間闕乏少得見錢糶買尚有饑困之人今點檢  
得定州省倉有專副杲榮趙昇界熙寧八年糶到軍糧  
白米及專副梁儉劉受界元豐三年米皆為年深夾雜  
損弱不堪就整充廂軍人糧支遣每月只充廂軍次米  
帶支今契勘得逐次止帶支五百石比至支絕更須三  
五年間顯見轉至陳惡兼聞本州管下村坊客戶見今

實闕餽糧其上等人戶雖各有田業緣值災傷亦甚闕食難以賑濟況客戶乃主戶之本若客戶闕食流散主戶亦須荒廢田土矣今相度欲望朝廷詳酌特降指揮下定州將兩界見在陳損白米二萬餘石分給借貸與鄉村第一等第二等主戶喫用令上件兩等人戶據客戶人數不限石斛依此保借候向去豐熟日依元糶例並令送納十分好白米入官不惟乘此饑年人戶闕食優加賑濟又使官中却得新好白米充軍糧支遣及免

年深轉至損壞盡為土壤如以為便即乞速賜指揮行  
下謹錄奏聞伏候勅旨

貼黃今來已是春深正當春夏青黃不交之際可以  
發脫上件陳米斛斛公私俱便若失此時則人戶必  
不願請不免守支積年化為糞壤乞斷自朝廷早賜  
指揮入急遞行下更不下有司徃復勘會今來所乞  
借貸皆是臣與官吏體問上戶願得此米以濟佃戶  
將來必無失陷與尋常賑貸一例支與貧下戶人催

納費力事體不同乞早賜行下

乞降度牒脩北嶽廟狀

紹聖元年三月日端明殿學士兼翰林侍讀學士左朝奉郎知定州蘇軾狀奏右臣伏見定州曲陽縣北嶽安天元聖帝廟建造年深屋宇頽弊自熙寧間因守臣薛向奏請止曾完葺正殿自餘諸殿及廊廡門宇墻垣久已踈漏破損前後累有守臣監司奏陳乞給賜錢或降度牒修完皆准省符止令依條以施利錢物充用緣近

歲民間屢值災歟施利微薄只了得遞年逐旋些小修補後來劉奉世又乞依薛向例於安撫司回易息錢內支錢三千貫助修嶽廟亦不蒙朝廷允許深慮摧壞日多為費滋大今據定州申檢計到合用工料價錢三千三百餘貫乞降空名度牒一十五道賣錢支用如朝廷不許降度牒即本廟有銀器一千三百餘兩別無使用欲乞依令出賣收買材植臣契勘上件銀器元係朝廷給賜以備供神之物若行出賣恐於事體有損況所費

錢數不多欲望聖慈特依定州所乞數目給降度牒付本州出賣應副修造庶得廟宇稍完不致破壞仍令本州通判兩員更互到彼提舉催促務要早令了畢上副朝廷崇奉之意謹錄奏聞伏候敕旨

貼黃臣伏以朝廷崇奉五嶽禮極嚴備凡有祈禱多獲感應今北嶽廟見弊陋理當完葺蓋所用度牒道數至少伏望特賜指揮施行庶稱朝廷尊事嶽廟之意

上皇帝書

臣軾謹昧死再拜皇帝陛下臣伏以今月初五日南至  
文武百僚入賀所以賀一陽來復也謹按易復卦雷在  
地中復先王以至日閉關商旅不行后不省方說易者  
曰乾六陽之氣也為十一月為十二月為正月為二月  
為三月為四月而乾之陽復矣陽極則陰生陰生則夏  
至矣坤六陰之氣也為五月為六月為七月為八月為  
九月為十月而坤之陰極矣陰極則陽生陽生則冬至

矣自太極分為二儀二儀分為四象四象分為十二月十二月分為三百六十五日五日為一候分為七十二候三候為一氣分為二十四氣上為日月星辰下為山川草木鳥獸蟲魚不出此陰陽之氣升降而已惟人全天地十干之氣十月而成形故能天能地能人一消一息一呼一吸晝夜與天地相通差舛毫忽則邪沴之氣干之矣故於冬至一陽之生也五陰在上五陽在伏而一陽初生於伏之下其氣至微其兆細縕可以靜而



不動可以畜養而不可以發宣故乾之初九爻曰潛龍勿用孔子曰陽在下也言陽氣方潛於下未可以用也先王於是日閉關商旅不行后不省方關者門戶所由以闔闢也商旅者動以利心也后者凡居人上者謂之羣后所以治事者也方者事也門戶不開則微陽閉而不出也利心不動則外物感而不應也方事不省則視聽收而不發也先王奉若天道如此之密用之於國則安靜而不勞用之於身則沖和而不竭昔者伏羲神農

黃帝堯舜皆得此道臣敢因至日以獻伏乞聖慈留神  
省覽實社稷無疆之福

任兵部尚書乞外郡劄子

臣向在揚州蒙恩除臣今任臣於本州及沿路附遞入  
文字辭免准聖旨劄子指揮為已差充鹵簿使大禮日  
迫不許遷延臣以此不敢堅辭尋於南京附遞奏乞候  
過南郊依前除臣一郡今來已過郊禮伏乞檢會累次  
奏狀除臣知越州一次取進止

辭兩職并乞郡劄子

臣近奏乞越州伏蒙聖恩降詔不允續准閣門告報已  
除臣端明殿學士兼翰林侍讀學士守禮部尚書聞命  
悸恐不知所措臣本以寵祿過分衰病有加故求外補  
實欲自便而榮名驟進兩職薦加不獨於臣有非據之  
羞亦恐朝廷無以待有勞之士豈徒內愧必致人言伏  
望聖慈特賜追寢仍乞檢會前奏除臣一郡若越州無  
闕乞自朝廷除授取進止

第二劄子

臣近奏乞辭免端明殿學士兼翰林侍讀學士守禮部尚書恩命仍乞檢會前奏除臣一郡蒙降詔不允聖恩隆厚天旨丁寧顧臣何人敢守微意但本緣請外更蒙陞擢兼帶兩職近歲所無有何勞能被此光寵欲乞追寢新命令臣且依舊供職則臣更不敢請郡若朝廷必欲臣受此職名即乞除臣一重難邊郡令臣盡力報稱猶可少安臣非敢自謂知兵若朝廷有開邊伐國之謀

求深入敢戰之帥則非臣所能辦若欲保境安民宣布  
威信使吏士用命無所失亡則承乏之際猶可備數伏  
望朝廷於此二者擇一以處臣非獨在臣分義當然亦  
朝廷名器不為虛授取進止

辭免兼侍讀劄子

臣近准閣門告報已降告命除臣兼侍讀者臣以迂愚  
本無學術出從吏役益復空疎竊位禁林已難久處而  
況天縱之學已集大成非臣孱微所可仰望伏望聖慈

追寢成命以授能者所有告命未敢祇受取進止

赴英州乞舟行狀

臣軾言近准誥命落兩職追一官謫守嶺南小郡臣尋火急治裝星夜上道今已行次濠州而自聞命已來憂悸成疾兩目昏障僅分道路左手不仁右臂緩弱六十年頭童齒豁疾病如此理不久長而所負罪名至重上孤恩義下愧平生悸傷血氣憂隔飲食所以疾病有加無瘳加以素來不善治生祿賜所得隨手耗盡道路

之費囊橐已空臣本作陸行日夜奔馳速於赴任而疾病若此資用不繼英州接人卒未能至定州送人不肯前去雇人買馬之資無所從出道盡塗窮譬如中流失舟抱一浮木恃此為命而木將沉臣之哀危亦云極矣竊伏思念得罪以來三改謫命聖恩保全終付一郡豈期聖主至仁至明尚念八年經筵之舊臣意欲全其性命乎臣若強衰病之餘生犯三伏之毒暑陸走災荒四千餘里則僵仆中途死於逆旅之下理在不疑雖罪累

之重不足多惜而死非其道則非仁聖不殺全育之意也輒已分散骨肉令長子帶往近地躬耕就食臣只帶家屬數人前去汴泗之間乘舟泛江倍道而行至南康軍出陵赴任所貴醫藥粥食不至大段失所臣竊揣自身多病早衰氣息僅屬必無生還之道然尚延晷刻於舟中畢餘生於治所雖以瘴癘死於嶺表亦所甘心比之陸行斃於中道藁葬路隅常為羈鬼則猶有間矣恭惟聖主之德下及昆蟲以臣曾經親近任使必不欲



置之死地所以輒為舟行之計敢望天慈少加憫惻臣  
無任

乞越州劄子

臣自去歲蒙恩召還即時奏乞越州蓋為臣從仕以來  
三任浙中麤知土俗所宜易於為政又以老病日加切  
於歸休舊有薄田在常州宜興縣久荒不治欲因赴任  
到彼少加完葺以為歸計越雖僻陋在臣安便及近者  
蒙恩知定州雖寵眷隆異而自早衰多難心力疲耗實

非所堪但以求州得州若便辭免是有揀擇所以勉強拜命今復念定雖重鎮了無邊警事權雄重祿賜優厚若辭定乞越於義無嫌伏望聖慈察臣至情特賜改差臣越州一次則公私皆便臣不勝幸甚取進止

再薦趙德麟狀

任兵部尚書日

右臣昨知潁州曾薦僉書本州節度判官廳公事趙令時乞置之館閣至今未蒙施行其人近已替罷旦夕赴闕朝見計其所養必不肯同衆人奔走干謁恐政府大

臣無緣得知其所學今繕寫趙某平日與臣詩文三軸  
進呈伏望聖慈清宴之暇一賜觀覽必有可取然後付  
之三省近臣考其人才亦足以副神考教養宗子之意  
謹具奏聞

論浙西閉糴狀

本路今歲不熟初水後旱早晚俱傷高下並損已具事  
由聞奏去訖勘會本路唯蘇湖常秀等州出米浩瀚常  
飽數路漕輸京師自杭睦以東衢婺等州謂之上鄉所

產微薄不了本土所食里諺云上鄉熟不抵下鄉一鍋  
粥蓋全仰蘇秀等州商旅販運以足官私之用今來雖  
一例災傷而蘇秀等州所產終是滂沛訪聞逐州例皆  
閉糴嚴立賞罰不許米斛出境是致杭州常平省倉糴  
買不行民亦闕食見今粳米已至八九十足錢尋具牒  
蘇秀等州不得閉糴訪問逐州雖承受本司指揮依舊  
閉糴尋差識字公人陳宥往秀州抄錄到所出榜示二  
本其大畧云如有諸色人擡價買米販往別州許人告

提立定賞多者至五十貫兼取問得杭州米行人狀稱  
因逐州見今立賞告捉私販全無米船到州認是逐州  
官吏堅意閉糴本司無緣止絕若商旅不行米貴不已  
公私窘乏賊盜之類何所不有以此合係本司知管除  
已牒轉運提刑司外須至奏聞者

右本司訪聞得浙中父老皆言熙寧七八年兩浙災傷  
人死大半當時雖係天時不熟亦是本路監司郡守如  
張靚沈起之流處置乖方助成災變既無方畧賑濟惟

務所在閉糴蘇秀等州米斛既不到杭杭州又禁米不得過浙東是致人心驚危有停塌之家亦皆深藏固惜不肯出糴民有衣被羅紈戴佩珠金而米不可得斃於道路不可勝數流殍之變古今罕聞伏望仁聖痛加哀憐曲賜過慮體念今來浙中雖未是大段凶年只恐官吏有失措置漸成災患所憂不小若商旅不行米貴不已農夫闕食春夏之交無力種則明年災傷公私並竭不知何以待之伏望聖慈深以熙寧之事為鑑嚴賜指

揮本路監司多方擘畫安之於未動救之於未危仍乞  
指揮速行止絕逐州閉糴所貴抗睦衢婺等州不至全  
然乏食謹錄奏聞伏候勅旨

再論閉糴狀

本路災傷本司已兩次奏聞竊見比年以來京東河北  
淮南等處災傷並蒙朝廷支賜錢米或於他路截撥斛  
斗賑救數目至廣今來本路災傷不敢便望支賜截撥  
只乞稍寬轉運司年額上供使得轉換擘畫多方救卹

已於十一月十日奏乞至今未奉指揮數內一事蘇湖  
常秀等州見今米商全不通行不唯逐州立賞閉糶亦  
為逐處稅務承例違條收米斛力勝稅錢是致商旅筭  
計脚錢本重無由興販檢會元祐編勅諸興販斛斗及  
以柴炭草木博糧食者並免納力勝稅錢注云舊收稅  
處依舊例即災傷地分雖有舊例亦免本司看詳本路  
見今災傷正合施行上條已牒諸州施行仍散榜轄下  
城郭鄉村外深慮逐處稅務自來收米斛力勝處指為



課額今來雖係災傷合依上條放免至年終比較日轉運司不容如此分說有虧欠例遭責罰須至奏請者

右伏望聖慈愍念本路災傷及前件放免力勝條貫係今來合行事件特賜指揮轉運司將來年終比較日除米斛力勝一項稅額權免比較科罰候將來豐熟日依舊所貴商旅通行場務亦免罪責謹錄奏聞伏候勅旨  
乞允文彥博等辭避免拜劄子

臣近奉聖旨撰賜文彥博呂公著今後入朝免拜詔書

今又准內降指揮撰不允彥博辭避免拜批答臣謹按禮經八十拜君命一坐再至所謂拜君命者傳命而拜非朝見也然且不免周天子賜齊桓公胙曰伯父耄老無下拜公曰天威不遠顔咫尺下拜登受所謂無下拜者拜於堂上非不拜也然且不敢鍾繇以足疾乘車就坐疑若不拜然亦無明文君前乘車豈足為法而馬燧延英不拜蓋是臨時優禮無今後遂不復拜之文祖宗舊例如呂端之流以老病進對亦止於臨時傳宣不拜

今來彥博公著今後免拜指揮自是朝廷優賢貴老度  
越古今無可議者但臣是有司合守典禮兼恐彥博公  
著終不敢當以臣愚見不若允其所請若聖恩優閤老  
臣眷眷不已遇其朝見間或傳宣不拜足以為非常之  
恩臣忝備侍從懷有所見不敢不盡所有不允批答臣  
未敢撰取進止

御寶批依奏脩撰  
允所請批答進入

乞允安燾辭免轉官劄子

臣今月八日準內批安燾辭免轉右光祿大夫劄子降

詔不許臣竊謂人主之馭羣臣專以禮義廉恥若使受無名之寵則為待臣子之輕今朝廷豈以執政六人五人進用故加遷秩以慰其心燾位冠西樞委寄至重豈肯見人擢用即以介懷既無授受之名僅似姑息之政縱有先朝故事亦是一時誤恩今燾力辭正為知義臣欲奉命草詔不知所以為詞伏望聖慈從其所請若除受別有緣故即乞明降指揮苟於義稍安敢不撰進取

進止

御寶批可且用一意度作不許辭免詔書進入

乞允宗晟辭免起復恩命劄子

臣今日準中書省批送到宗晟辭免起復恩命劄子奉聖旨送學士院降詔不允謹按宗晟飭行有素持喪中禮所辭恩命已四不允而宗晟確然固守其辭愈哀且曰念臣執喪報親之日短致命殉國之日長出于至誠可謂純孝臣謂宗晟未經祥練之變且無金革之虞孝治之朝宜聽所守因以風厲宗室庶皆守禮篤親顧不美哉若以宗正之任恐難其人亦當差官權攝須其從


吉復以命之臣忝備禁從不敢不言所有不允詔書臣未敢撰取進止

乞致仕表

臣軾先自端明殿學士兼翰林侍讀學士朝奉郎定州路安撫使蒙恩落職降授承議郎知英州遂貶寧遠軍節度副使惠州安置經涉四年蒙恩責授瓊州別駕昌化軍安置又三年半該陛下登極大赦量移廉州安置又經皇子赦恩移舒州團練使永州居住臣以老病久

伏瘴毒頓仆道塗未至永州特蒙聖恩復授臣朝奉郎  
提舉成都府玉局觀外州軍任便居住臣素有薄田在  
常州宜興縣粗了餽粥所以崎嶇萬里奔歸常州以盡  
餘年而臣人微罪重骨寒命薄難以受陛下再生之賜  
於五月間行至真州瘴毒大作乘船至潤州昏不知人  
者累日今已至常州百病橫生四肢腫滿渴瘃唾血全  
不能食者二十餘日矣自料必死臣今行年六十有六  
死亦何恨但草木昆蟲貪生之意尚復留戀聖世以辭

此寵祿或可苟延歲月欲望朝廷哀憐特許臣守本官  
致仕臣無任



東坡全集卷六十五